



*Jumat, 20 September 2024*  
**Ogen: Sakaria 9:11-17**



**Gandum Ras Anggur Si Mbaru**



Pemulihan' jadi sada hal si arapken manusia ibas kegeluhen. Si rubat banci erteman mulihken, si iukum banci ibebasken, sisakit banci malem, si gulut ukurna banci salang sai. Bageme kegeluhen bangsa Dibata, ipadanken Dibata maka bangsana e pagi jore ka mulihken. Ertina, nai kesangapen ras kiniulin me siinanami bangsa enda erkiteken pasu-pasu Dibata. Pembuangan erbahan bangsa enda kelsehen, nina Dibata maka ipulahina me bangsaNa ibas kubang simbages nari. Erkiteken kiniseran siinanamina maka ibereken Dibata dua kali lipat pasu-pasuna. Ibas paksana ikelini Dibata bangsaNa, igambarken Sakaria desken pemakan ngkelini biri-biri iabas bahaya nari. Bangsa e kedungenna ersinalsal desken permata ibas mahkota. Ibas paksa si reh taneh inganna tading ras nuan-nuan ipasu-pasu Dibata mejile ras mehuli, tentunya mehumur kal. Alu abge kesusurena eme anak perana ras singuda-nguda mejuah juah erkiteken gandum ras anngur simbaru.

Bageme ipulihken, ipelimbaru kegeluhen bangsa enda rikut ras inganna tading ras erjuma. Kerina dosa, kesalahen, ukumen i ambekken Dibata alu bage kegeluhenna siipelimbaru e jadi sada keriahen ras kesangapen man bana ras kesusurena. Kegelhenta pe labo banci bage-bage saja, kiniseran ras perbeben pe labo banci ertahan. Lit paksana ibeneken Dibata perbeben sibage rupana ibas kegeluhenta nari. Isalihken Dibata kendelen jadi keriahen, kiniseran jadi kemalemen ate. Desken pangan inemen si ipasu-pasu Dibata, sehat mejuah-juah dirinta ras anak-anakta, endame ipadanken Dibata man kalak siikelengiNa. Pebelin pengarapenta, timai perkuah ateNa. Erkuasa IA nandangi kerina si la uli isalihken jadi mehuli.